

مُوسى پَيغمبر

بعد از وفاتِ یوسفِ یگ پادشاهِ دیگه دَ مصر حُکمرانی مُوكد که او یوسف ره نَمِینَخشید. او دَ دربار و دَ مردم خو گُفت: "مو باید آمی بنی اسرائیل ره خوب زیر نظر بِگیری. تعدادِ ازوا دَ سر زمینِ مو غدر شده و اونا از مو کده زور استه. بیید که بعد ازی قد ازوا هوشیارانه رفتار کنی. اگه نَه، تعداد شی زیاد شده موره، و دَ حالِ جنگ اونا قد دُشمنون مو یگ جای شده قد از مو جنگ مُونه."

پس مِصری ها دَ سرِ بنی اسرائیل، که آم قَوم عبرانی گُفته مُوشُد، سرکارگرای سختگیر تعیین کد، تاکه اونا ره زیر فِشار بَیره. اونا بنی اسرائیل ره مجبور کد که شارا ره جور کنه و هر رقم کارای سختِ دیگه ره ام دَ سرِ از اونا آندخت. مگم آر چند زیادتر که اونا دَ زیرِ ظُلم و فِشار بود، تعداد شی زیاد شده مورفت و مِصری ها از بنی اسرائیل ترس مُوخرد.

اوخته، پادشاه مصر که فرعون گفته موشد، دایه های عبرانی گفت: "وختیکه دخاتونوی عبرانی دایه گری مونید، اگه بچه پیدا شد او ره بکشید و اگه دختر بود او ره زنده نگاه کنید." مگم دایه ها خدا ترس بود و از آید پادشاه مصر نموشد.

پادشاه دایه ها گفت: "چرا بچه ها ره زنده ایشتید؟" گفت: "خاتونوی عبرانی مثل خاتونوی مصری نیه. اونا قوی و ژکره يه و پیش از رسیدون دایه اولاد مونه." و خدا دایه ها ره از شر فرعون نجات دد، و تعداد بنی اسرائیل زیاد شد و اونا زور گرفت.

پس پادشاه مصر د پگ مردم خو امر کد که "هر بچه عبرانی تازه پیدا شده ره داریای نیل بندزید. مگم دخترون شی ره زنده بیلید."

اوخته، دَخانِه يگ آدم و خاتونشی از قَومِ عبرانی و خانوارِ لاوی، يک بَچه پَیدا شُد. او زن بَچهِ خُوره بَلدے سِه ماه تاشه کد. مگم غَيْتِ که خاتو بَچهِ خُوره دِيگه نَتنَست که تاشه کُنه، پَس ازی يگ سَبَد ره گِرفته قِير ره دَرُوي شی ليش کد. بعد ازو نِلغهِ خُوره دَما بيِن شی ايشهه او ره دَمنَس نَيزارای دریاِي نِيل ايله کد. مگم خوارِ ازو نِلغه از کمی دُورتر توخ مُوكد که دَسَرِ ازو نِلغه چی واقِعه میه.

دَمزُو غَيْت دُختِرِ پادشاه قد كنِيزای خُوره بَلدے غُسل کدو دَدریا آمد. او آمُو سَبَد ره دَقدِ نَيزارای دریا هُوش کد و يگی از كنِيزای خُوره رَيی کد تاکه او ره از آو بُر کُنه. وختِيکه دُختِرِ فِرعَون سر پوشِ سَبَد ره باله کد نِلغه دَگِريه کدو شُد، و دِل شی دَحالِ نِلغه سوخت و او گُفت: "اي يگی از نِلغه های عِبرانی استه."

پس خوارِ نِلغه دَديِر دُختِرِ فِرعَون آمده گُفت: "مي خاهي که

بورم و يگي از خاتونوي شيردار عيرانى ره كوي كنم
تاكه اي نلغه ره بلدے تو شير بدیه؟"

او گفت: "ار، بورو، كوي كو." پس او دختر دخانه خو
رفته آبه نلغه ره كوي كده دپيش دختري پادشاه او رد.

دختري پادشاه دشى گفت: "اي نلغه ره ببر و بلدے از مه
شير بدی و ما حق توره ميدم." او خاتونلغه ره برد
نگاه کد.

نلغه كله شد و آبه شى او ره گرفته دپيش دختري پادشاه
مصر برد. پس دختري پادشاه آمو بچه ره مثل أولاد خو قبول
کده او ره 'موسى' نام ايشت، يعني "از آو کشیده." و
موسى د قصر پادشاه مصر كله شد.

سالها تير شد که يگ روز حضرت موسى د ديدون قوماي خو
رفت، و د اونجي ديد که يگ نفر مصری يگ بنى اسرائيلى

ره دَرَو مِيزَنَه. و مُوسى اَي سُو و اُو سُو توخ کد که يگو
کس او ره نَنگرنَه و بعد ازو اَمُو شخصِ مصری ره زَد و کُشت
و او ره دَ قَدِ رِيگ گور کد. دَ روزِ دِيگِه شی حضرت مُوسى
دُو نفرِ بَنَى إِسرائِيل ره دِيد که دَ بَين خُونگ مُونه. از
جنگره پُرسان کد: "چرا يگ قَوم خُوره مِيزَنَى؟"

او دَ جواب شی گُفت: "تُوره کی دَ سِر از مو قاضی جور کده؟
میخاهی مرَه اَم بُكْشی اَمُو رقمی که او آدمِ مصری ره
کُشتی؟" آلى مُوسى فامِید که مردم ازی واقعه خبر شُده.

وختِیکه پادشاهِ مصر اَي توره ره شِند، میخاست او ره از
بَين بُبره. ليکِن مُوسى از پیش شی دُوتا کده دَ سر زِمینِ
مَدیان رَفت و دَ پالُوي يگ چاه شِشت.

دَ أونجی يگ پیشوا بود دَ نام 'يَترون' که صاحِبِ هفت
دُختر بود. او خته، اَي دُخترا آمد تاکه بَلَدِ رَمَهِ آتِه خُو او
بِکشه. مَگم چوپونا آمده اُونا ره از سِر چاه اَي کد. ولے

حضرت مُوسى بال شُدَه دَ كومكِ دُخترو رَسِيده رَمَهِ شَى رَه آو
دد.

وختِيکه دُخترو دَ پيشِ آتهِ خُو بَسَ أَمَد، آتهِ ازوا پُرسان کد:
”چُطُور شُدَه که إِمروز اِيقس زُود أَمديد؟“

أونا گفت: ”يگ آدمِ مصری مو ره از دِستِ چوپونو نِجات دَد،
وَ أَمَّا اِنْجاتِهِ فَكَانَتْ مِنْ حَلَقَةِ سَبَقَتْهُ الْمُرْكَبَةِ.“

بسَمَ آتهِ شَى پُرسان کد: ”آلى أَوْ آدمَ دَ كُجايَه؟ چرا أَوْ رَه
قد خُو نَهَ أَوْ رَدِيد؟ بُورِيدَ أَوْ رَه كُويَ كُنِيدَ که قد از مو
نان بُخوره.“

پس دُخترون يترُون أَمَدَه حضرت مُوسى رَه دَ خانَهِ خُو دَعَوت
کد. أَوْ دَعَوت شَى رَه قَبُولَ کد وَ بعد اِزُو دَ خانَهِ يترُون
مَند. وَ يترُون دُختر خُو، صَفُورا رَه دَزشَى دَد.

سال‌ها تیر شُد و پادشاهِ مصر فَوت کد، مَگم بَنی إِسرائِيل از خاطرِ غُلامی و بَردگی خُو ناله مُوكد، و داد و فَريادِ ازوا دَ پيِشگاهِ خُدا رَسيِد. پس خُدا قولی ره که قد ابراهِيم، إِسحاق و يعقوب کده بُود، ياد کد.

يگ روز حضرت مُوسى رَمهِ خُسْر خُوره او سُونِ داشت چرندو بُرد، که بَلغه ملائِيكهِ خُداوند رَقمیَ الَّنگِ آتش از مَنْس بُوْثه دزشی ظاھِير شُد. مُوسى دَيد که از مَنْس بُوْثه درَو آتش بُور مُوشِه مَگم نَمُوسوزه. او قد خُود خُو گُفت: "عَجِيب استه! چرا أَمِي بُوْثه نَمُوسوزه؟" و نَزَديک رفت که تو خ کُنه. دَأُو غَيْت خُداوند مُوسى ره از مَنْس بُوْثه کُوي کده گُفت: "آي مُوسى، نَزَديک نَشُو! پاي خُوره لُوچ کُو؛ أَمِي جای که تُوايسته شُدَجای مُقدَّس استه. ما خُدای اجداد تُو، ابراهِيم و إِسحاق و يعقوب استُم."

غَيْتِ که مُوسى آواز ره شِند، از هَيَّبَت و بُزُرگی خُدا ترسِ خورده رُوي خُوره تашه کد. خُدا بسم گُفت:

”ما از رَنْج و مُصِيَّبَتِ بِنْدَگُون خُوَدَ مِصر خبر درُم
و نالِهِ ازوا دَزْمَه رَسِيَّدَه.

آلی اُونا ره از چَنگِ مِصری ها خلاص مُونُم
و دَ سر زِمِینِ بِراخ و حاصلِ خیز مُوبِرُم.
اوخته، ما تُوره دَ پیشِ فِرَعَون رَیَّی مُونُم
تاکه بَنَی إِسْرَائِيل ره از مِصر بُور کنی.“

لیکِن حضرت مُوسَى دَ خُداوند گُفت: ”ما کی استُم که
پیشِ فِرَعَون بُورُم و بَنَی إِسْرَائِيل ره از مِصر بُور کنُم؟ و
اگه دَ دِیرِ بَنَی إِسْرَائِيل بُورُم و دزوا بُگُم که خُدای بابه
کلونای شُمو مَره رَیَّی کده، و اُونا پُرسان کُنه که نام
شی چی استه؟ پَس دزوا چی بُگُم؟“

خُداوند دَ مُوسَى پَیغمبر گُفت: ”ما بودیم و استُم. دَ بَنَی
إِسْرَائِيل اینی رقم بُگی: خُدای که بوده و استه، آمُو خُدای
بابه کلونای شُمو اِبراہِیم، اِسْحاق و یعقوب مَره دَ دِیرِ
شُمو رَیَّی کده. بَعد آَزو بُزرگَای إِسْرَائِيل تورای تُوره

اوخته، قد بُرگای بنی اسرائیل د پیش فِرعون بورو و دزو بُگی که خداوند، خدای عِبرانی ها، دزمو ظاهر شده و امر کده که ”بورید و د صحراء بَلَدَ مه قُربانی تقدیم کُنید.“ لیکن ما میدنُم تاکه فِرعون زیر فِشار نیه، شُمو ره نَمیله که از مصر بُور شُنید. پس ما مصری ها ره جِزا مِیدُم و بعد ازْو فِرعون شُمو ره ایله مونه.

و یگ چیز دیگه: شُمو دستِ خالی نمورید لیکن آر خاتُون اسرائیلی از همسایهِ مصری خُو کالا و نُقره و زیوراتِ طِلّای ره طلب مونه و دَ أولادای خُو مُوپوشنه. دزی رقم شُمو مصری ها ره چُور و چپاول مُونید.

موسیٰ پیغمبر د خداوند گفت: ”اگه بنی اسرائیل دَزمه اعتبار نَداشته بشه و تورای مره باور نگُنه، پس چی کار کنم؟“

خُداوند گُفت: "دَ دِست تُو چِی استه؟"

"گُفت: "تَیاغ."

گُفت: "أُوره دَ رُوي زِمي پورته کُو!" و حضرت مُوسى تَياغ ره دَ زِمي پورته کد، که بِيبلَغه، تَياغ دَ مار تَبَديل شُد و حضرت مُوسى ازو دُوتا کد.

خُداوند گُفت: "أُوره از دُم شى بِكِير." و حضرت مُوسى که أُوره گِرفت، مار دوباره دَ تَياغ تَبَديل شُده.

مُوسى پَيغمبر بِسم گُفت: "آي خُداوند، تُومِيدَنِي ما هرگِز توره گویى خوب نييُم، نَه دَ سابق، و نَه آلى، اзи که ما تو تَله استُم. خاھِش مُونُم که دِيگه کس ره دَ جای ازمه رَيى كنِي."

پس خُداوند بَلَه مُوسى قار شُدَه گُفت: "برار تُو هارُون توره گوی خوب استه. امُو چِيزای ره که ما قد از تُو مُوگُم، تُوبِسم قد هارُون بُکَى، تاکه او از طرف از تُو خُن مردم گپ بِزَنه."

حضرت مُوسى راضى شُد که سُون مِصر پس بوره. هارُون آم طرفِ حضرت مُوسى آمد و مُوسى تمام گبای خُداوند ره دَشى گُفت. امُو رقم آر دُوى شى بُزْرگای بنى إسرائیل ره کُوى کده جَمَ کَد ، و حضرت مُوسى مُعجِزه مار و دِگه مُعجِزه خُدا ره دَزوا نِشو دَد ، و اوْنا باور کد که خُدا واقعاً مُوسى پَيغمبر ره رَىيَ کده تاکه بنى إسرائیل ره از شَرِ مِصری ها نِجات بِدیه، ازی که خُداوند ناله و فرياد ازوا ره شنیده بود. پس تمام شى رُوى خُوره دَزمی کده خُدا ره عِبادت کد.